

Gazel

*Ey felek dâim beni sen nâmurâd etmek neden
Beni gamgîn eyleyip ağyârı şâd etmek neden*

*Dâd elinden ey felek her gün bana cevri eyleyip
Ol rakîb-i kâfire adl ile dâd etmek neden*

*Câhilin verip felek maksudun ehl-i dânişin
Nâmurâd olmasını dâim murâd etmek neden*

*Hûra benzer ol sanem sûretde gerçi ey felek
Sen bu hüsn ile onu kâfir-nijâd etmek neden*

*Ni'met-i vaslı felek verip rakîbe zehrini
Kâsesini pür edip **Adli**'ye zâd etmek neden*